

## Morning Regional Dogri News

04 -Feb.- 2026

09.20 Hrs

### Headlines

1. केन्द्र नै फलें ते बागें ते मकामी अर्थबवस्था दी सुरक्षा लेई जम्मू-कश्मीर दियें त्रै प्रस्तावित रेलवे परियोजनाएं गी रोकी दिता ऐ। उमर अब्दुल्ला ते हित्त धारकें इस फैसले दा सुआगत कीता ऐ।
2. जम्मू-कश्मीर विधान सभा च उपराज्यपाल हुंदे सम्बोधन दे धन्नवाद प्रस्ताव उप्पर चर्चा परतियै शुरु होगा।
3. मुखमन्त्री उमर अब्दुल्ला होरें बक्ख-बक्ख धार्मिक थाहरें लेई JKRTC बसें गी झंडी दस्सियै रवाना कीता।
4. उधमपुर दे बसंतगढ़ इलाकें च सुरक्षाबलें ते आतंकवादियें बश्कार टाकार जारी ऐ।
5. मौसम विभाग नै जम्मू-कश्मीर च अगले इक हफ्ते तक्कर- मौसम आमतौर पर खुश्क रौहने दी पेशनगोई कीती ऐ।

<><><><><><>

### Railway Projects Halted

सेब दे बागे ते मकामी अर्थबवस्था गी ध्यानै च रखदे होई ते चुनी गेदी सरकार ते मकामी नुमायंदें आसेया पेश कीती गेदी चिंताएं दे मगरा केन्द्र नै जम्मू-कश्मीर च त्रै प्रस्तावित रेलवे परियोजनाएं गी फिलहाल रोकी दिता ऐ। केन्द्री रेल मंत्री अश्विनी वैष्णव होरें आखेया ऐ जे इक विस्तृत सर्वेक्षण दे बाद बागें गी होने आहले संभावित नुक्सान बारे पता लग्गा ऐ। इस करी इनें परियोजनें गी फिलहाल बंद करी दिता गया ऐ।

इस फैसलै दा राजनीतिक पार्टियें ते मकामी हितधारकें सुआगत कीता ऐ। उनें आखेया जे इस कन्नै करसानें दे हितें ते संभावित नुक्सान कोला बचाऽ होगा। मुखमन्त्री उमर अब्दुल्ला होरें इस फैसले दी सराहना कीती ते मकामी चिंताएं गी समझनें लेई रेल मंत्री हुंदा आभार जताया।

<><><><><><>

## LA Proceeding

जम्मू-कश्मीर विधानसभा च अज्ज उपराज्यपाल दे सम्बोधन दे धन्नवाद प्रस्ताव उप्पर चर्चा परतियै शुरु होग। मुख्मन्त्री उमर अब्दुल्ला होर बी अज्ज दा मुख् बिल पेश करगंन। इक बिल च कारोबार करने च सौख आस्तै उसी अपराधमुक्त ते तर्कसंगत बनाने लेई किश कनूनें च संशोधन करने लेई पेश कीता जाग ते दुए बिल दा मकसद कोढ कन्नै प्रभावत लोकें कन्नै बेर'वा बरताऽ खत्म करने ते सकारात्मक कारवाई दे राएं बरोबर बरताऽ गी यकीनी बनाना ऐ। दौनें बिल Official Gazette च पैहले दे मौजूद न।

<><><><><><>

## CM –RTC Busses

मुख्मन्त्री उमर अब्दुल्ला होरें बक्ख-बक्ख धार्मिक थाहरें लेई जे एंड के रोड ट्रांस्पोर्ट कारपोरेशन दियें बसें गी एम.ए स्टेडियम जम्मू थमां झंडी दस्सियै रवाना कीता। एह विशेष बसां श्रद्धालुएं गी Shahdra Sharief- Jwalaji- Mc Leod Ganj च Namgyal Monastery श्री आनंदपुर साहिब ते अजमेर शरीफ वगैरा थाहरें पर लेई जागंन। इस मौके पर बोलदे हई मुख्मन्त्री होरें आखेया जे इय्यै जनेह जत्त जम्मू-कश्मीर च- लोक कियां इक दुए कन्नै मिलियै रौहन्दे न- इक-दुए प्रति प्यार ते सौहार्द आहली भावना गी दर्शादि न। इय्यै जनेई गैंऽ एकता- आपसी भाई-चारे- अन्तर राज्यीय राबता ते सैलसफा गी बढ़ावा दिंदे न।

<><><><><><>

## Special Trains

यात्रियें दे भारी रश गी दिक्खदे होई उत्तर रेलवे अज्ज दूए रोज बी श्री माता वैष्णो देवी कटरा ते श्रीनगर बश्कार 2 विशेष रेल सेवा चला करदा ऐ। एह रेलगड्डियां अपने सफर दौरान बनिहाल च रुकगंन। इस पैहल दा मकसद फसे दे यात्रियें दी मदद करना ते नियमित परिवहन सेवाएं च विघ्न पौने दे चलदे आरक्षित ते सुविधाजनक यात्रा गी यकीनी बनाना ऐ। रेलवे अधिकारियें यात्रियें गी सलाह दिती ऐ जे ओहू आरक्षण दी स्थिति ते ट्रेन दे समें दी पैहले सोयां जांच करी लैन कि जे इस दौरान यात्रियें दी मंग मती रौहने दी मेद ऐ। यात्री आधिकारिक रेलवे वेबसाइट, हेल्पलाइन नंबर 139 या राष्ट्रीय ट्रेन पूछताछ प्रणाली राएं मती जानकारी हासिल करी सकदे न।

## Prog. Announcement

आकाशवाणी जम्मू दा क्षेत्रीय समाचार एकांश, अज्ज दपैहरी साङ्गे 12 बजे कैसर सरबन्धी अंतरराष्ट्री ध्याङ्गे दे उपलक्ष्य च 30एं मिंटे दे इक बशेश कार्यक्रम दा प्रसारण करोग- जेदा विशेसार होग कैसर, एहदे लक्षण, कारण ते इलाज। इस बशेश कार्यक्रम च स्थाडियां परौहिनयां होडन सरकारी मेडिकल कॉलेज जम्मू दे रेडिएशन ऑनकालजी विभाग दियां असिस्टेंट प्रोफेसर डॉ. संदीप कौर- जेह्णियां इस विशे पर अपने माहिराणा बचार सांझे करडन। इस कार्यक्रम दी मेज़बानी साङ्गे न्यूज़ एंकर जगमोहन शर्मा आसेआ कीती जाह्ग।

<><><><><><>

## Encounter Udhampur

उधमपुर जिले च सुरक्षाबलें ते आतंकवादियें बश्कार इक टाकरा भखी पेया। इलाके च आतंकवादियें दी मौजूदगी बारे थ्होई दी इक टकोहदी सूह पर कारवाई करदे होई सुरक्षाबलें आसेया सांझा तपाशी अभियान चलाया गया। व्हाईट नाइट कोर नै सोशल मीडिया दी इक पोस्ट च जानकारी दिती ऐ जे सेना दी CIF डेल्टा- जम्मू-कश्मीर पुलस ते सी.आर.पी.एफ आसेया सांझे तौरा पर अभियान चलाया गया। सुरक्षाबलें ते आतंकवादियें बश्कार कल संजा गोलीबारी होई। खीरी खबरां थ्होने तगर दौने भेठा दा गोली बारी जारी ही।

<><><><><><>

## CS Nabard

राई-बाई ते ग्रामीण विकास सरबन्धी राष्ट्रीय बैंक नाबार्ड नै जम्मू-कश्मीर दे तरजीह आहले सैक्टरें लेई 2026-27 बरे आस्तै 49 ज्हार 7 सौ 95 करोड़ 58 लख रपे बक्ख रक्खे दे न। मुख सचिव अटल डुल्लु होरें इस बारे सरबन्धी कागज़ कल नाबार्ड आसेया आयोजित दोआर-कर्जें सरबन्धी सैमीनार च जारी कीते। इस दौरान दस्सेया गया जे राशी राई-बाई-ल भलेया लौहके-लौहके ते दरमेयाने दर्जें दे उद्योगें- ग्रामीण ढांचागत विकास- बागबानी दस्तकारी- हत्खखड्डी-किसान दोआर कार्ड ते FPO बगैरा लेई ऐ। मुख सचिव होरें बैंकें ते सरकारी मैहकमे गी आपूं'चै नेडमा तालमेल बनाइयै कम्म करने लेई गलाया।

<><><><><><>

## Pending Compensation

जिला प्रशासन जम्मू नै इक मील दा पत्थर साबित करदे होई 2022 थमां लेइयै सारे सिङ्क हादसें दे मुकाबलें आहले लंबित मामलें गी हल करी दिता ऐ। साहूडे जिला संवाददाता दी रिपोर्ट मुजब डिप्टी कमीशनर राकेश मिन्हास होरें दस्सेया जे पीडित ते प्रभावत परोआरें गी तकरीबन इक करोड़ रुपें दी राशी सीद्दे लाऽ दे तौरा उप्पर वितरण करी दिती गेई ऐ। मीडिया आहलें कन्नै गल्लबात करदे होई उ'नें आखेया जे 107 लंबित मामलें दा नबेड़ा कीता गेया ऐ- जेहदे चलदे आर.टी.ओ दफ्तर च हून कोई बी मामला लंबित नैई ऐ। जिला मैजिस्ट्रेट होरें ट्रैफिक पुलिस ते गड्डियें सरबन्धी मैहकमे गी निर्देश दिता जे ओ गड्डियें सरबन्धी अपने अभियान तेज करन।

<><><><><><>

## ARTO- Reasi Comeras

यात्रियें दी सुरक्षा गी होर पुख्ता करने लेई इक बड्डी गैंऽ दे तौरा पर रियासी च अधिकारियें सब्भनें सार्वजनिक ते व्यवसायिक गड्डियें च सामने डैश कैमरें गी जरूरी करी दिता ऐ। Asstt. Regional Transport Officer Nazir Ahmad Khan होरें आखेया ऐ जे इस गैंऽ दा मकसद सिङ्कें उप्पर अनुशासन च सुधार- घटनाएं दी निगरानी ते गड्डियें सरबन्धी कनून -1988 गी सख्ती कन्नै लागू करने गी यकीनी बनाना ऐ। लोकें इस फैसले दा सुआगत कीता ऐ। अधिकारियें दस्सेया ऐ जे कैमरे लगाने कन्नै ट्रैफिक दे नियमें दी उल्लंघना दे खलाफ – समें-सिर कारवाई करने च मदद थ्होग ए.आर.टी.ओ Nazir Ahmad Khan होरें इस बारे होर जानकारी दिंदे होई आखेया

<><><><><><>

## Weather

मौसम विभाग नै जम्मू-कश्मीर च अगले इक हफ्ते तोड़ी मौसम आमतौर पर खुशक रौहने दी पेशगोई कीती ऐ पर उच्चियें धारें पर मौसम च किश बदलाव होई सकदा ऐ। विभाग नै अज्ज गास आमतौर पर साफ रौहने दी पेशगोई कीती ऐ पर 6 फरवरी गी रातीं लै उच्चियें धारें पर किश थाहरें हलकी बर्फबारी होई सकदी ऐ। 7 ते 8 फरवरी गी मौसम आमतौर पर साफ रौहग उआं 9 ते 10 फरवरी गी किश थाहरें पर हलकी बरखा ते बर्फबारी होई सकदी ऐ। 11 ते 12 फरवरी थमां मौसम फही आमतौर पर खुशक गै रौहग।